

**Narsami aammalu Kullorsuarmi ilaqtariinnut siunnersortit ukiut marluk
suligasuartussanik Naalakkersuisut aallarnisaanissamut peqquneqarnissaanik
Inatsisartunut aalajangiiffigisassatut siunnersuut. Suligasuarnerit naammassippata
naliliiffigineqassapput, nunatta sinneranut siammarneqarsinnaanersoq
nalilersornissaanut siunertaralugu.**

(Inatsisartunut ilaasortaq Nivi Olsen, Demokraatit)

pillugu

Ilaqtariinnermut Peqqissutsimullu Ataatsimiititaliap

siunnersuutip aappassaaneerpeqarnerannut

ISUMALIUTISSIISSUTAA

Ataatsimiititaliaq suliarinninnermini uku ilaasortarai:

Inatsisartunut ilaasortaq Mala Høy Kúko, Siumut, siulittaasoq
Inatsisartunut ilaasortaq Bjørk L. Olsen, Demokraatit, siulittaasup tullia
Inatsisartunut ilaasortaq Hans Peter Poulsen, Siumut
Inatsisartunut ilaasortaq Mikivsuk Thomassen, Inuit Ataqatigiit
Inatsisartunut ilaasortaq Eqaluk Høegh, Inuit Ataqatigiit
Inatsisartunut ilaasortaq Najaaraq Møller, Siumut
Inatsisartunut ilaasortaq Emanuel Nûko, Naleraq

23. maj 2023-imi UPA2023-imi siullermeerinerup kingorna siunnersuut ataatsimiititaliap misissorpaa.

Siunnersuutip imarisaa siunertaalu

Ilaqtariinnut siunnersorteqalernissamut periarfissiisoqarnissaa siunnersuutigineqartumi siunertarineqarpoq. Neqeroorutigineqartoq ilaqtariinnut ilaqtariittut siunnersorneqarnissamik ilaqtariittullu ilitsersorneqarnissamik pisariaqartitsisunut sammitinneqassaaq, aammalu inuuniarnikkut atukkamikkut ajornartorsiuteqartunut neqeroorutigineqarnissaa eqqarsaatigineqanngitsoq siunnersuuteqartoq isumaqarpoq. Piviusunngortinneqarnerani suliniutigineqartoq Narsami Kullorsuarmilu pilersinneqassaaq.

Siunnersuutip Inatsisartunit siullermeerneqarnera

Siullermeerinninnermi oqallittoqarpoq, aammali ilaqtariinnut siunnersortit qanoq ilinniagaqarnissaannik/ piginnaasaqarnissaannik neqeroortitsinnermi oqartussanit sorlernit ingerlanneqartarnissaa aammalu suliniutigineqartup Narsamiinnissaanut Kullorsuarmiinnissaanullu suut tunngavilersuutigineqassanersut nalornissutigineqarluni. Ilaqtariinnut siunnersuisarneq kommunit susassaqaarfiisa ataaniinnera aammalu ilaqtariinnut sullissivinni ammasumik siunnersorneqarnissamat ullumikkut periarfissaqareenera innersuussutigalugit siunnersuutip itigartitsissutigineqarnissaa Naalakkersuisut inassutigaat. Immikkoortoq ataatsimiititaliami sukumiisumik suliarineqartussanngorlugu innersuunneqarpoq

Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunnngortinneqarnissaanut aningaasaqarnikkut allaffissornikkullu kingunerisassat siunnersuummi tunngavilersuutitut allaaserineqassasut. Siunnersuutip piviusunnngortinneqarnissaanut 2,5 mio. kr.-inik aningaasartuuteqarnissaq siunnersuuteqartup naatsorsuutigaa. Taama naatsorsuuteqarnermut ataatsimiititaliaq oqaaseqaatissaqanngilaq.

Ataatsimiititaliap siunnersuummik suliarinninnera

Ilaqtariit amerlanerusut ilitserorneqarnissamat siunnersorneqarnissamullu neqeroorfigineqarnissamat periarfissinneqarnissaat siunnersuuteqartup siunertarigaa ataatsimiititaliaq naliliivoq. Ilaqtariinnut sullissivinni ammasumik siunnersorneqarnissamat ilaqtariit tamarmik periarfissaqareersut Naalakkersuisut oqaatigigaat ataatsimiititaliap maluginiarpa.

Ataatsimiititaliap inassuteqaatai

- Ataatsimiititaliami amerlanerusussuteqartut Inuit Ataqatigiinneersut aamma Siumumeersut siunnersuuttip itigartinneqarnissaa inassutigaat
- Demokraatineersoq imaattumik ikinnerussuteqarluni oqaaseqaateqarniarpoq:

Ataatsimiitsitaliami ikinnerussuteqarlutik inissisimasut Demokraatit, siunnersuummut ima oqaaseqassapput:

Ataatsimiitsitaliami amerlanerussuteqartut isumaginninnerup iluani aqputit nutaat ujartuiffiginissaannut kissaateqannginnerat Demokraatiniit pakatsinartutut isigaarput. Inuiaqatigiittut ilaqtariit avissaartuuttarnerat imaluunniit ingerlanerlulertarnerat ajornartorsuutigingaatsiarparput, meeqqallu angerlarsimaffiup avataanut inissinneqartartartut amerlavallaarput ilutigisaanillu pisortat isumaginninnermut aningaasartuutaasa qaffakkiartuutiguagaralugit. Matumani ilaqtariinnut siunnersortit pinaveersaartitsisinnaasutut Demokraatiniit isigaarput. Aningaasanik atuilluarnikkut ilaqtariit ikiorsernissaannik siunertaq pineqarpoq. Nunatsinni ilaqtariit

ingerlalluartut qanoq pilersissinnaanerlutigit eqqarsaatiginerusariaqarparput. Ilaqutariimmi ingerlalluartut inuiaqaatigiinni artukkiineq ajorput, aningaasatigut imaluunniit isumaginninnikkut. Illuatungaani inuiaqaatigiinnut pisuunnguallatsitsisuusarput.

Ilaqutariinnut siunnersortit (Familiecoaches) aappariit avittarnerannut pinaveersaartitsisinnaagaluarput kingunerisaanillu soorlu meerarisamut pilersuisussaataitanernut, inissanut aammalu ineqarnermut tapinut inuiaqatigiit sipaaruteqarsinnaassagaluarput. Ilaqutariinnut siunnersortit aamma angerlarsimaffiup avataanut inissiisarnernut pinaveersaartitseqataasinnaagaluarput. Piffinnilu tunngavilinnik ilaqutariinnut siunnersorteqalernikkut sumiiffinni ajornartorsiutit qanimut piffikkaartuni isumaginninnikkut iluarsiniarneqarsinnaassagaluarlutik. Angerlarsimaffiup avataanut inissiisarneq kisimiitillugu isigissagaanni kisitsisit 2018-meersut takutippaat meeraq angerlarsimaffiup avataanut inissinnerasigut ulloq unnuarlu agguaqatigiisillugu kommuuninut 2.775 koruuneqartoq. Tassa ukiumut meeraq ataaseq angerlarsimaffiup avataanut inissinneqarnera 1 million koruuninik akeqartarpoq. Siunnersuutigineqartutuut Narsami Kullorsuarmilu ilaqutariinnut siunnersortit misiliutigineqartussat ukiut marlunnut 2,5 million koruuninik naleqartussatut siunniunneqarsimapput. Allatut oqaatigalugu ilaqutariinnut siunnersortit sisamat ukiut marluk ingerlaneranni angerlarsimaffiup avataanut inissiinerit pingasut pinngitsoortissinnaagunigit inuiaqaatigiittut sipaaruteqarfigissagaluarparput. Tamatuma avataasigut ilaqutariinnut siunnersortit avittarnerup pinaveersaartissinnaagaluarunigit, kommuunini isumaginninnerup iluani sipaaruteqartitsingaatsiarsinnaagaluarput.

Ilanngutissavarpullu ilaqutariinnut siunnersortinit ilaqutariit ikiorneqarlutillu ikorfartorneqartussat inuunermi iluarisimaarinninnerulernerisa naleqassusissaa. Immaqa avissimasussaagaluani pinngitsoortitsisinnaapput? Immaqa meeqqat nuannaarnerulersissinnaavagut? Qularinngilluinnarparput misiliutissatut suliniutigineqarsinnaasut pappilissatigut iluaqutissatut taakkartorneqartutut pitsaatigisumik sunniuteqarsinnaanersut misilinnissaat akilersinnaalluortoq. Oqariartuutigeqqiinnassavara ilaqutareeqarneq peqqissoq naleqassusaa apeqquserneqassanngimmat, suliniutillu kingunerisaanik iluaqutissat aningaasannorlugit nalilersorneqarsinnaanngitsut pitsanngoriaatigineqartussat aamma eqqaamassagatsigit.

Taamatut tunngavilersorlutik ikinnerussuteqartut siunnersuut akuerineqarnissaa innersuussutigaat.

Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.

Mala Høy Kúko
Siulittaasoq

Bjørk L. Olsen
Siulittaasup tullia

Hans Peter Poulsen

Najaaraq Møller

Mikivsuk Thomassen

Eqaluk Høegh

Emanuel Nûko